

律例館校正洗冤錄

律例館校正洗冤錄卷三

目錄

疑難雜說

屍傷雜說

病屍

猝中死

冒時氣

中暑

餓死屍

醉飽死

築路內損

作過死

跌磕

外物壓塞口鼻

中風

傷寒

斑疹

凍死屍

驚怖死

燒酒醉死

鍼灸死

受杖死

塌壓

硬物癰疔

馬牛踐踏

雷震擊

車輪壓
虎咬

癩狗傷

蛇蟲傷

死後蟲鼠傷

路死屍

論中毒

服毒

辨生前死後

諸毒

中蠱

金蠶蠱

鼠莽毒

巴豆毒

砒霜

鈎吻毒

冰片毒

水銀

食果實金石藥毒

中酒毒

茵草

銀鋤

鹽漬

潑灰汁

黃芩

苦杏仁

草烏頭毒

鳩鳥頭毒

意外諸毒

莧鯨並食

漏滴肉

河鮑風梨並食

蛇遺水

三足蟹

食魚投荊花毒

黃蠟毒

守宮毒

空屋邪毒

煤炭毒

鹽肉荊芥毒

蜜酢並食

食物變改及食禁

瓶花水

毒草

雞毒

鯨毒

晒衣暑

蛇虺涎

律例館校正洗冤錄卷三

上海市歷史文
獻圖書館藏

疑難雜說

凡檢屍差之毫釐失之千里切勿輕視常有勒殺類
乎自縊溺死類乎投水鬪毆有在限內致命而實因
患病身死僕婢因被捶撻在主家自害自縊之類情
迹不同並爲疑難務須臨時審察

凡檢驗疑難屍首如刃物所傷透過者須看內外瘡
口大處爲行刃處小處爲透過處如屍首已爛須看
其原衣服比傷着去處屍或覆臥其右手有短刃物

及竹頭之類。自喉至臍下者。或是酒醉攙倒。自壓自傷。如貼近有登高處。或泥中。須看身上有無他故。錢物有無損動處。恐因取物失脚自傷之類。

將人致死。或經久屍肉腐爛。無跡可憑者。但檢驗顙門一骨。諺稱天靈蓋。必浮出腦壳骨縫之外。少許其骨色淡紅。或微青。皆因罨_音絕呼吸。氣血上湧所致。只撥驗此骨便明。

凡命門骨最屬虛怯。以手擊之。即可立斃。因命門骨左右兩穴有紅筋。若細絲通於兩內腎。拍_音即死。外

無痕跡。若有告稱拍着命門處身死。只檢驗命門骨。紫赤者卽是其命門骨。自尾蛆骨倒數上第七髓兩旁各有一小穴者是。

凡屍身無痕損。惟面色有青黯。或一邊似腫。多是被人以物搭口鼻。及罨捫殺。或是用手巾布袋之類絞殺。故不見痕。須看項上肉硬。此最爲切要處。手足有無繫縛痕。舌上或有嚼破痕。大小便二處。或有踏腫痕。若無此類。方看口內有無涎唾。喉間腫與不腫。如有涎及腫。恐有纏喉風死。或是酒醉猝死。宜詳。

有鬪毆之後。各自分散。或近江河池塘。洗頭面血。或取水喫。但因相打力乏。或因醉相打後。頭暈音運失跌。落水渰死。初落水時尚活。其屍腹肚膨脹。十指甲內有沙泥。兩手向前。此是落水淹死。相驗分明。雖有毆擊痕損去處。一一填入驗狀。定作毆後落水致命。緣打傷雖在要害處。尚有辜限。及限外以他故死者。各依本毆傷法。此既是落水身死。則雖有傷痕。其實以他故死。◎更有相打分散後。乘高撲下而死者。但須驗失脚處高下。撲損痕癢。致命要害處。仍根究眼見。

相打分散之証佐人。

恐爲相打者所
枕故須詳究

凡因爭鬪致死而屍上並無痕損。此或是被傷人舊有宿患氣疾。或是未毆以前先曾飲酒至醉。及爭鬪時有所觸碍。以致氣絕而死也。如此者。腎子或縮上。不見。須用溫醋湯蘸音贊衣服。或棉絮之類。罨一飯時。令件作以手按小腹下。其腎子自下。卽其驗也。然後仔細看要害致命處。

有年老虛弱之人。與人爭鬪。登時氣絕。沿身無傷。更驗腎囊兩子。多是一箇縮上。須用手按小肚腹。則腎

子自下。

驗屍諸處並無傷損。又無病狀。難爲定驗者。恐是被
人將刃物釘入顙門。或腦中致命。先須令屍親干証
人等立狀訖。然後剗除死人髮髻驗之。

如被殘害死者。須檢齒舌耳鼻內。或手足指甲中有
簽刺之類。

凡檢驗屍首。指定作被打後服毒身死。及被打後自
縊身死。被打後投水身死之類。須要見得親切。若是
打死人後。以藥灌入口中。誣以自服毒藥。或死後用

繩弔起。假作生前自縊。或死後推在水中。假作自投水者。一有差誤。關係不小。必須仔細點檢。死人在身痕傷。如果不是要害致命去處。其自縊投水。及自服毒。皆有確據實跡。方可明白開報。

若昏夜被殺。見証無人。及屍無下落者。只宜案候密訪。不可妄意猜疑。鍛鍊成獄。

凡疑難檢驗。及兩爭之家。稍有勢力。須選慣熟伴作人。謹慎守分者。隨帶同行。毋使暫離左右。飲食水火。令人監之。少休以待其來。不如是。則恐其作私舞弊。

變動事情枉屈人命不可不慎。

屍傷雜說

凡驗病死之人。須先問本人來自何處。幾時到來。有無熟人識認。原患是何疾病。年歲若干。病幾日身死。若是奴婢。則先討契書看。問有無親戚。曾請是何醫人。喫甚藥。問明因由。然後對衆証定。如別無他故。只取驗狀。聲明遍身黃色骨瘦。委是生前因患是何疾病致死。仍取醫人驗狀一紙。如果衆証因病身死分明。既不是非理致死。不須請復驗。

凡因病死者。形體羸瘦。肉色痿黃。口眼多合。腹肚低

陷。兩眼通黃。兩拳微握。髮髻解脫。身上或有新舊針灸瘡痕。餘無他故。是因病死。

凡患病求乞在路死者。形體瘦弱。肉色痿黃。口眼合。兩手微握。口齒焦黃。唇不蓋齒。

或疾病死。值春夏秋初。經隔兩三日。肚上臍下兩脇肋骨縫。有微青色。此是病人死後。經日變動。腹內穢污發作。攻注皮膚。致有此色。不是生前有他故。

邪魔中風猝死。屍多肥。肉色微黃。口眼合。頭髮緊。口內有涎沫。遍身無他故。

猝死。肌肉不陷。口鼻內有涎沫。面色紫赤。蓋其人未死時。涎壅於上。氣不宣通。故如此。

猝中死。眼開睛白。口齒閉。牙關緊。間有口眼喎斜。并口兩角鼻內涎沫流出手。腳拳曲。

中暗風。屍必肥。肉多澁白色。口眼皆閉。涎唾流溢。猝死於邪祟。其屍不在於肥瘦。兩手皆握。手足爪甲多青。或暗風如發驚搐死者。口眼多喎斜。手足必拳縮。臂腿手足細小。涎沫亦流出。

傷寒死。遍身紫赤色。口眼開有紫汗流出。唇亦微綻。

手不握拳。

冒時氣死者。眼閉口開。遍身黃色。畧有薄皮起。手足俱伸。

斑疹死。皮肉上只有星點紅斑痕。而不甚浮腫。

中暑死。多在五六月。眼合。舌與糞門俱不出。面黃白色。亦有鼻孔及糞門有血出者。

凍死者。面色痿黃。口內有涎沫。牙齒硬。身直。兩手緊

抱胸前。一說項縮脚拳。檢時用酒醋洗。少得熱氣。則兩腮紅。

面如芙蓉色。口有涎沫出。其涎不粘。

餓死者。渾身黑瘦硬直。眼閉口開。牙關緊禁。臍肚低塌。手足俱伸。

驚死者。目瞪口開。兩手舒展。猶若怕怖之狀。

凡驗酒食醉飽致死者。先令伴作用醋湯洗檢在身。如無痕損。以手拍死人肚皮。膨脹而響者。卽是因食飽腹脹。酒醉心肺致死。仍取屍親供狀。死人生前常喫酒多少致醉。及現今喫酒多少數目。以驗致死。因由。

如或吐瀉瘦弱。皮膚微黑。不破裂。口內無血。而唇指甲不青。糞門不腫突。乃是飲酒相反之狀。

燒酒醉死者。牙齒動搖欲落。屍軟弱不硬。口鼻間有

血水流出。●燒酒不可以錫器盛炖。及過宿。倘爲日稍久。飲之則能殺人。其人之面多青黯。

昔有人燒酒醉後。復引烟而死者。又有人醉燒酒。身頗畏寒。以綿被厚蓋之而死。又有人醉燒酒。索飲冷水數碗而死。或曰。冷水徐飲。可以漸引火毒外達。若連飲過多。熱毒爲冷所遏。無由透達。故閉厥不救。

凡酒食醉飽後。被築踏內損死者。其狀甚難明。若屍別無他故。惟口鼻糞門有飲食。并糞帶血流出。驗此等屍。須仔細體究。曾與人交爭。因而築踏。見証分明。方可定狀。一說。其屍遍身微紅。口眼俱開。兼有血出。兩手握。肚腹脹。

鍼灸死者。須另勾留人。驗鍼灸處。是否穴道。有無錯誤。致死因由。

五臟之氣。已絕於內。而用鍼者。反實其外。是謂重竭。

重竭必死。其死也靜。臟氣已絕於內。陰虛也。反實其外。誤益陽也。益陽則愈損其陰。

是重竭也。陰竭必死。死則靜也。

五臟之氣。已絕於外。而用鍼者。反實其內。是謂逆厥。

逆厥必死。其死也躁。臟氣已絕於外。陽虛也。反實其內。誤補陰也。助陰則陽氣愈竭。

故至四逆而厥逆厥必死。死必躁也。

凡男子作過太多。精氣耗盡。脫死於婦人身上者。真

偽不可不察。真則陽不衰。偽者則痿。

昔有人暈一婢而脫者。欽時啓所蓋被異香。四發此因服房藥多麝。麝通透之品故也。夢中脫死者男則陽不衰。女則陰必洩。屍俱有笑容。

男女因陰陽症死者。唇及指甲多青黯。甚或遍身皆紫。乃氣絕血凝之故。

陰症死者。屍青黑黯。似毒死形。而色微淡。口眼合。兩手握。陽縮小。餘精流出。

凡受杖而死者。須驗所受杖處瘡痕濶狹。看外腎并陰囊。婦人陰門。並兩脇肋腰小腹等處。有無血癰痕。

小杖痕。左邊橫長三寸。濶二寸五分。右邊橫長三寸五分。濶三寸。各深三分。

大杖痕。左右各方圓三寸。至三寸五分。各深三分。各有膿水。兼瘡週迴。亦有膿水淹浸。皮肉潰爛去處。

杖後有因他故死者。若兩腿面及小腹有微紅色。勿以曾經受杖。便作血瘀傷痕。蓋受杖時。按捺在地。或被硬物碰傷。死後自然發現。臨時務須分別。

兩臂上各有破傷。斜長幾寸。濶幾分。深至骨上有血。赤。委是受杖決。因風透患。致命身死。

凡從樹及屋臨高跌死者。看枝柯掛絆所在。并屋高低失脚處踪跡。或土痕高下。及要害處。須有抵牾。或物磕擦痕癢。若內損致命者。口眼耳鼻內。定有血出。若傷重分明。更當細驗之。仍量撲落處高低丈尺。跌者從高而下。或失足。或自絆。其力在下。則所傷多在腿足及臂膊。然其或左或右。又皆止傷半邊。如係人推而跌者。則其力在上。所傷多在頭面及兩手腕。蓋推之力大。而人之一身。其最重莫如首。推而下之。勢必自顧。或兩手先至地。或出於不知。則頭面必先

倒垂而下。雖亦未必全傷。而所傷與自跌者不同。凡被塌壓死者。兩眼突出。舌亦出。兩手微握。遍身死血。淤紫黯色。或鼻有血。或清水出。傷處有血。瘀赤腫。皮破處四畔赤腫。或骨并筋皮斷折。壓着要害致命。如不壓着要害。不致死。或死後壓。卽無此狀。

凡舍屋及牆倒。或石頭脫落壓死者。其屍沿身虛怯。要害處。若有痕損。須聲明長濶分寸。作堅硬物壓痕。仍看骨損與不損。若樹木壓死。要看所倒樹木。斜傷着痕損分寸。死後壓者。亦無此狀。

兩人共擡一物。一人力大。驟爲擡起。一人力小被壓。則所壓之肩窩。及相對之手足。必俱有傷。如誤觸而壓傷者。當辨其前後左右。如被壓於後。則前有跌磕微傷。被壓於前。則後有跌磕微傷。左右亦然。

凡外物壓塞口鼻。出氣不得。以致身死者。眼開睛突。口鼻內流出清血水。滿面血瘀赤黑色。糞門突出。及便溺污衣服等件。

凡被人衣服或濕紙搭口鼻死。則腹乾脹。被他物壓塞而死者。其兩手外膊。不拘上下。兩足後。

骨並心胸之前。俱各有微傷。方是蓋悶至晴突壓之。必重。身雖不能展動。未有併手足壓定。不能稍動者。如或併縛其手足。則亦當驗手足有無束縛傷痕。

或有將人飲醉厚其毬褥。挾令橫臥。俟其睡熟。然後將毬褥捲而束之。倒立片時。卽死者。並無口眼血出。

諸跡。卽或微有。淨洗卽無。而酒氣倍爲薰蒸。一說大

皆平弱而無脹形。又按讀律佩觿云。凡脹在兩肋。及心胸之前。按之堅實。擊之無聲者。卽是。若檢背則傷在頂心。及

兩足心骨。

有以高桶二隻。疊而合之。約如人身之高下。以下桶

貯水令滿。入石灰數升攪渾。將人倒入水中。再以所合之桶蓋上。片時卽死。名曰游湖。其人死後。用水洗淨。毫無傷跡。面色微黃而白。一如病死。雖云有血倒出。然見灰氣卽回。而血之應凝滯於面者。得灰盡解。此若非檢骨。則不得其實。檢骨之法。必在腦殼之內。蓋灰滓從口鼻而入口。鼻雖可淨洗。而從鼻灌者。直入於腦。灰最沉滯。腦內必多灰滓。以此爲驗。自無所遁。

凡被硬物癰疔

音

死者。肋後有癰疔。着紫赤腫。方圓

三寸四寸許。皮不破。用手揣捏着筋骨傷損。此爲虛怯要害致命處。

凡被馬踏死者。屍色微黃。兩手散。頭髮不慢。口鼻中多有血出。痕黑色。被踏要害處便死。骨折腸臟出。若只觸倒。或踏不着要害處。卽有皮破癰。赤黑痕。不致死。○驢足痕小。牛角觸着處。多在心頭胸前。或在小腹脇肋。若皮不破。傷亦赤腫。○牛角傷痕小。而深者方是。

人馬驢騾踏傷者。有緩急叢亂之分。總以傷之多寡輕重爲辨。馬馳力大。所傷處少。傷必骨折。或腸臟出。

擁擠仆地而踏傷必多。但不似馳驟者之力重而折甚。人踏傷成片而長。一頭重。一頭輕。叢踏不起者。則輕重長短不一。驢騾踏傷。不獨較小於馬。其傷之暈。凝聚成形。牛觸係不知而驟攫者。傷多在前。兩肋之半。小腹及心胸。若牛佚而奔。方避之而不及。則受傷多在脊背。及肋之左右。

凡被車輪攫死者。其屍肉色微黃。口眼開。兩手微握。

頭髻緊。

速死者屍狀如此。經數日死者異是。

凡車輪頭攫着處。多在心頭胸前。并兩脇肋要害處。

便死。不是要害不致死。

車有橫輦直輦之分。橫輦者。十字路口。人從橫過。車行急驟。不及挽回。其人跌仆被輦而死。則或項或首。或心胸背脊肋腹。或手膊腿足。各有經過傷。如係對面迎輦者。其傷或手足。或脇肋。却皆或左或右。俱在半邊。直而經過。其傷必長。却多在仰面。若人在前行。車從後至。傷亦如之。但屬在背居多。

凡被雷震死者。其屍肉色焦黃。渾身軟黑。兩手拳散。口開眼皺。音脫皮。剝也。耳後髮際焦黃。頭髮披散。燒着處。

皮肉緊硬而攣縮。身上衣服燒爛。或不燒。傷損痕迹。多在腦上及腦後。腦縫多開。鬚髮如焰火燒焦。從上至下。時有手掌大片浮皮紫赤。肉不損。胸項背膊上。或有似篆文痕跡。○雷有震擊二項。震者被驚而死。無傷。擊則有傷痕。

衡陽人某被雷擊死。身首俱無。燒痕惟左足大指上。如斜刺一孔。甚深。自腳心起至膝上。焦黃如炙。亦無篆字文。

凡被虎咬死者。屍肉色黃。口眼多開。兩手拳握。髮髻散亂。糞出。傷處多不齊整。有舌舐齒咬痕跡。

虎咬人多咬頭項上。身上有爪痕。擗聲上損痕。傷處

成窟。或見骨。心頭胸前臂腿上有傷處。地上有虎跡。

勒畫匠畫出虎跡。并令村甲及傷人處地鄰爲証。虎

咬人。月初咬頭項。月中咬腹背。月終咬兩足。貓咬鼠亦然。

凡被獺狗傷死者。傷處必有痕跡。腹脹硬。陰莖挺出。

其毒發之時。如感冒風寒之狀。畏風特甚。時作狗聲。

每欲齧人及衣物。小腹墜脹。小便難。

凡被蛇蟲傷致死者。其被傷處。微有齧損黑痕。四畔

青腫。有黃水流。毒氣灌注四肢。身體光腫。面黑。

死後被蟲鼠傷者。皮破無血。破處週圍有齧痕踪跡。有皮肉不齊處。若他物咬。則痕跡粗大。

道路死屍。地方申報。卽行相驗明白。開造有無傷痕。約畧年紀。填註面貌衣服。如有攜帶行李財帛。眼同鄰甲公驗貯庫。以俟親人認領。買棺殮封。培土暫埋。標立記號。若係冤死之屍。尤必斟酌申報。

論中毒

凡可以致人於死者。非獨砒鴆爲然。而參附爲尤甚。日夕服之不置。以致口鼻流血。膚爲寸裂而死。岐黃書中更有青筋脹一症。卽俗所謂烏沙脹。倘誤認爲陰症。而投之以藥。則斷乎不救。凡此等症候。及陰症之不救者。兩手足指甲皆青黯。或盡青紫。甚則頭面及遍身皆紫黯。緣其血敗。積而成色故也。又閩粵多瘴癘。凡爲瘴癘所中之人。急令人以磁鋒代刺。或於額上。或於眉叢。或於兩臂膊立出血升餘。則瘥。病淺

者血紅而多。病深者血紫而少。若紫黑而極少。則病甚深。乃倖而僅救者耳。土人每以得血稱賀。如或不得血。或得之艱澁。則咸知不治。及其死也。其屍頭面。或多青黯。或盡紫黑。其手足指甲亦然。又肺癰腸風。及中臟諸症。未死之前。吐出惡物。或瀉下黑血。穀道腫突。或大腸突出等項。豈可盡視爲中毒之驗耶。且如日用飲食中。其物性相反。誤食而死者。更復不少。卽如生葱不可見蜜。河魴不可見芎灰之類。苟因其死之暴。而狐疑以推之。則大謬矣。

滇粵等省受瘴癘身死者頗多。其屍不盡青紫黑黯。亦有面色紅赤。唇口紫黑。胸腹咽喉脹滿。手足指甲俱青黯。口眼耳鼻并糞門小便處所亦間有血出。若死後檢骨。骨多青暈色。

毒有自外入而非飲食致者。如蟲蛇等毒物傷。則皮上有齧損痕。若狂犬傷瘡乾後死。亦有齒痕。但分大小耳。各所傷處。但青黑腫。

凡中毒屍骸潰爛。檢骨則骨上下黯黑色。胸膈心坎牙根十指尖。骨俱青色。

服毒死

凡服毒死者。口眼多開。面紫黯。或青色。唇紫黑。手足指甲俱青黯。口眼耳鼻間有血出。甚者遍身黑腫。面作青黑色。唇捲發炮。舌縮。或裂折爛腫微出。唇亦爛腫。或裂折。指甲尖黑。喉腹脹。作黑色。生炮。身或青斑。眼突。耳鼻口內。出紫黑血。鬚髮浮亂。

未死前。須吐出惡物。或瀉下黑血。穀道腫突。或大腸

突出。

服毒多而速死者。形狀始有此。

凡服毒死。或卽時發作。或當日早晚。若其藥慢。或一

日二日方發。或翻吐。或吐不絕。仍須於衣服上尋餘藥。及死者坐處尋藥物器皿之類。

驗服毒用銀釵。皂角水揩洗過。探入死人口內。以紙密封良久。取出作青黑色。再用皂角水揩洗。其色不去。如無。其色鮮白。人既死。雖非服毒。未免有穢。故銀釵亦作黑色。但洗之即去也。惟真中毒。雖洗數次。其色青黑。不能鮮白。

按毒藥身死者。事多曖昧。全憑銀釵定驗。虛實銀釵假偽。一觸穢氣。其色即變。難以辨明。若臨事取辨於民。則情弊多端。必須令工匠用足色銀成造。以官對脾試驗。鑒記封收。專為驗屍需用。亦絕寬濫之一端也。

又一法用大米。或黏米三升炊飯。用淨糯米一升淘洗訖。用布袋盛。就所炊飯上炊蒸。取雞子一箇。鴨子亦可。細破取白。拌糯米飯令勻。依前裱起。着在前大米黏米飯上。以手三指緊握糯米飯如雞子大。毋令冷急。開屍口。齒外放着。及用小紙三五張。搭遮屍口耳鼻。臀陰門之處。仍用新綿絮三五條。醢音念醋三五升。用猛火煎數沸。將綿絮放醋鍋內。煮半時取出。仍用糟盤罨屍。却將綿絮蓋覆。若是死人生前被毒。其屍卽腫脹。口內黑臭惡汁。自然噴來。綿絮上不可近。後除

去綿絮。糯米飯被臭惡之汁。亦黑色而臭。此是受毒藥之狀。如無則非也。

又一法。將白飯一塊。入死人口中喉內。用紙蓋一兩時辰。取出飯與雞吃。雞亦死卽是。

有空腹服毒。惟腹肚青脹。而唇指甲不青者。有食飽後服毒。惟唇指甲青。而腹肚不青者。又有腹臑虛弱。老病之人。畧服毒而便死。腹肚口唇指甲並不青者。却須參以他症。驗虛弱老病人。先以銀釵探喉中。如果色變。還作服毒論。其後方以他症參之。須詳審此人未死。前有何病症虛損等情。

有服毒已久。蘊積在內。試驗不出者。須先以銀釵探入死人喉訖。却用熱糟醋。自下捲洗。漸漸向上。須令氣透。其毒氣蒸蒸。黑色始見。如便將熱糟醋自上而下。則其熱氣逼毒氣向下。不復可見。或就糞門上試探。則用糟醋當反是。

服毒中毒。若生前喫物壓下。入腸臟內。試驗無証。卽自穀道內試。其色卽見。

服毒辨生前死後

生前中毒。遍身作青黑。多日而皮肉尙有。亦作黑色。

若經久皮肉腐爛見骨其骨黯黑色胸膈心坎牙根
十指尖俱青色。

死後將毒藥置口內假作中毒皮肉與骨只作黃白
色。

有本是中毒輒驗稱服毒者宜仔細辨之。

諸毒

中蠱毒者。遍身上下。頭面胸心。並深青黑色。肚脹。或口內吐血。或糞門瀉血。

造蠱者。取百虫置皿中。經年開視。有一虫盡食諸虫。而獨存者爲蠱。故字從蟲從皿也。能隱形似鬼神。其毒不一。皆變亂元氣。多因飲食行之。

南方有蠱毒之鄉。於他家飲食。卽以犀角攪之。白沫竦起。卽爲有毒。無沫者卽無毒。令病人吐於水內。沉者是蠱。浮者卽非。或令合黑豆。豆脹皮脫者是蠱。豆不脹皮不脫者卽非。

中金蠱毒。死屍瘦劣。遍身黃白色。眼睛塌。口齒露出。上下唇縮。腹肚塌。將銀釵驗作黃浪色。用皂角水

洗不去。金蠶。蠱毒之巧者。服之而死。與病死者無異。但銀釵上黃浪色。洗之不去。此金蠶之色也。

又有身體脹。皮肉似湯火炮起。漸次爲膿。舌頭唇鼻

皆破裂。乃是中金蠶毒之狀。上言瘦人。此言肥人。

金蠶一名食錦虫。虫屈如指環。食故緋帛錦。如蠶之食葉。滇蜀湖廣閩粵皆有。奸人畜之。取其糞置飲食中。毒人。人卽死。蠶得所欲。則日置他財。使人暴富。然遺之極難。水火兵刃。都不能害。必俟其所致金銀錦物。置蠶於中。投之路旁。人偶收之。蠶隨以往。謂之嫁金蠶。不然。入人腹。殘害腸胃。完而後出也。

粵西有藥思蠶。狀似蠶。雞虫。如蠶豆大。能變幻作小孩形。遺嫁之法。彷彿金蠶。

中鼠莽草毒。江西南有之。亦類中蠱毒。加之唇裂。齒齦

青黑色。此毒經一宿一日方見。九竅有血出。

莽草本作罔。人以毒鼠故名鼠莽。食之令人迷罔。南中川蜀以及上谷皆有之。木若石楠。葉稀無花。一說藤生。繞石間。是名罔草。

中巴豆毒。口乾。兩臉赤。五心煩熱。痢不止。

中砒霜毒。得一伏時。遍身發小皰。作青黑色。眼睛聳出。舌上生小刺。皰綻出。口唇破裂。兩目脹大。腹肚膨脹。糞門脹綻。十指甲青黑。

中砒霜毒。吐逆腸腹絞痛不可忍。發狂。七竅迸血。口唇亦青黑色。若飽時服。上一半青。饑時服下一半青。

外腎脹大

砒石出信州玉山。有砒井。故亦名信。又隱信字。爲人言。此井官封。禁取甚嚴。然他處出銅錫之山。往往有之。生者名砒。黃赤色。毒緩。以火煉之。令烟上着器。疑結作白霜者。名砒霜。毒尤熱烈。若遇酒及燒酒。尤腐爛腸胃。頃刻殺人。

中鉤吻毒。百竅流血。狀與砒霜畧同。

鉤吻卽野葛。因入口鉤人喉吻。故曰鉤吻。廣人謂之胡蔓草。又曰離腸草。滇人謂之火把花。岳州謂之黃藤。其草近人則葉動。蔓生葉圓而光。春夏苗葉甚。秋冬草枯稍緩。五六月開花。似佛蘭花。黃滇南花紅。

中冰片毒。熱酒服冰片錢許。則正氣散亂。血脉沸騰。

七竅流血而死。

中水銀毒身死者。以黃金驗之。色白者是。

食果實金石藥毒者。其屍上下。或有一二處赤腫。有類拳手傷痕。或成大片青黑色。爪甲黑。身體肉縫微有血。或腹脹。或瀉血。

中酒毒。腹脹。或吐瀉血。

中藥毒。苗音董。手腳指甲及身上青黑色。口鼻內多出血。皮肉多裂。舌與糞門皆露出。服銀鋤死。檢驗傷痕法。各書中俱無載。

按銀鋤性主腐爛皮肉。今人每用以去痔。此物投入腸胃。非此砒藥諸毒。性烈。服之卽眼鼻竅流血。唇齒豁裂。指甲青黑。現有外傷。可以檢驗。係粘入腸胃。漸漸腐爛。令人如患病狀。或半月一月而死。却無外現傷形。又金銀圓光無鋒芒者。入腹可下。若剪碎尖稜。勾住腸胃。能令人斷腸而死。亦無外傷。可以檢驗。此種人命。旣無檢驗之法。姑闕疑。以俟留心體察。

服鹽滿死者。髮亂。手指甲禿。胸前有爪傷痕。因痛極不可忍。徧地滾跌。自抓搥音所致。

服鹵死者。身不發皰。口不破裂。腹不膨脹。指甲不青。釵探不黑。頗有黯色。洗之卽白。遍身黃。兩眼合。口中或有涎沫。但其屍雖發變。心肺不爛。取汁煎之。猶能

成鹽

服澣衣所用灰汁死者。有乘人病時。以灰汁煎藥。毒之致死者。髮亂。指甲禿。身拳曲。口鼻有血。

中莨

音郎

若

音蕩

毒

悶亂如猝中風。

或似熱盛狂病。

一名水莨

莨葉圓而光。誤食令人狂亂。或吐血。

中苦杏仁毒。西北諸省。有苦杏仁。生熟服之。都不爲

害。畧用火炒。仍令半生。服數十粒。卽能死人。其屍眼

閉。舌唇耳竅手足。十指俱青色。肚腹有青色塊。

每有食以

詐人者。人不易防。最難禁化。惟急取吐。吐出可解。

中草烏頭毒。江左山南有草烏頭。其汁煎之名射罔。俱大有熱毒。而射罔更烈。塗破傷損處。立能殺人。

中鵠鳥毒。

南海有鵠鳥。似鷹而大。狀如鵠。紫黑色。赤喙黑目。頸長七八寸。雄名運日。鵠名陰諧。

食蛇及椽實。蛇入口卽爛。其尿溺着石。石皆黃爛。飲水處。百蟲吸之皆死。巢於大木之顛。其下數十步。草不生。人誤食其肉。立死。惟得犀角。其毒卽解。

意外諸毒

莧鰲併食毒。

昔有人將鰲與莧併食之。遂病死。屍未殮。忽小鰲無數。自九竅湧出。散走馬廐中。惟遇馬溺者。輒化為水。又有人誤食鰲莧。飲馬溺得瘥。或云白馬溺尤良。

食鹽肉喫荊芥茶殺人。

本草昔有人喫黃魚羹罷。採荊芥和茶而飲。少頃足底奇

痒。上徹心肺。跣行沙中。馳走如狂。足皮皆破欲裂。急求解毒藥餌之。兩日乃止。

荊芥一名假蘇。本草謂性溫。不然。實微涼。數見食黃鰲魚偶犯荊芥者。必立死。甚於釣吻毒。

茅舍漏滴肉上食之殺人。

蜜鮮併食毒。

韶州月華寺側民家設僧供新蜜方熟羣僧飽之有某院長老兩人還至半道遇村墟賣餅買食盡半斤至夕皆死。

河魴風藥並食毒。

昔有人招友晨餐者烹河魴爲饌友以故不食遺歸餽妻妻方平明服藥不以爲慮啜之甚美卽時口鼻流血而絕。

食物變改及食禁。○按禽獸虫魚之屬。或有感沴氣所生。形質變異者。如獸有岐尾。蟹有獨螯。羊一角。雞四足是也。○物有形色變異者。如白鳥烏首。烏雞白首。白馬青蹄。白馬黑蹄是也。○有形色無異。其肉變

怪者如落地不沾灰塵。經宿肉體尙暖。曝炙不燥。入水自動之類是也。○有皮肉無異。腸臟變改者。如肝色青黯。腎氣紫黑。魚無腸膽。牛肝葉孤之類是也。○有一物常食。性善與他物相反。過口而害人者。如鯢魚同鹿肉。食之殺人。羊肉同鱠酪。食之害人。羊肝得生椒。破人臟。猪肉得胡荽。雖音爛人臍是也。○有一物常食。性平與他物相感。入腹成動物者。如鱠生同酥乳食之。變諸虫。鯨肉與莧菜食之。還生鯨。牛肉同猪肉食之。成寸白虫。猪羊肉以桑楮柴煮炙食之。亦成

寸白虫也。

飲蛇遺水毒。

湖州陳某。因步春。渴掬澗水咽之。數日覺心腹微痛。日久疼甚。醫診之云。心脾受毒。今心脈損甚。陳語其故。醫曰。蛇遺不淨在澗。子誤飲其水。蛇已成形在腹。食心而痛也。遂以水調雄黃服之。果下赤蛇數條。皆能行。

飲瓶花水毒。

宋汪待舉。字懷中。守處州郡。部民有飲客者。客醉臥於空室中。夜醒酒渴。索漿不得。乃取花瓶水飲之。次早啓戶。客死矣。其家訟於官。待舉寃舍宇所有物。惟瓶浸旱蓮而已。細鞠之。訟乃白。○一云瓶浸蠟梅。

食三足鰲毒。

太倉州民道見漁者持一鰲而三足買歸。令婦烹之既熟呼婦共食婦不欲食出坐門外。久不聞其夫聲入視已失所在。地上止存髮一縷衣服冠履事事皆在。如蛻形者。驚怖號喚里甲以婦爲謀殺夫而詐設也。官爲鞠之得其情乃原婦罪。

草藥夾雜毒草。

英州僧某往州南三十里掃塔有客船自番禺至舟中士人携一僕僕病脚弱不能行舟師憫之曰吾有一藥治此病如神既賽廟畢飲酢頗醉乃入山求藥漬酒授病者其藥入口腸胃卽痛如刀割遲明而死士人咎舟師舟師恚卽取所餘藥白漬酒服之不踰時亦死蓋山多斷腸草人食之輒死而舟師所取藥爲根蔓所纏結醉不暇擇徑投酒中是以及於禍則知草藥不

可妄服也。

食物過荆林毒。

單縣有田作者。其婦餉之。食畢死。翁姑曰。婦意也。陳於官。不勝筭楚。遂誣服。是時天久不雨。許某時官山東。曰。獄其有冤乎。乃親歷其地。出獄囚。徧審之。至餉婦。乃曰。夫婦相守。人之至願。鳩毒殺人。計之至密者也。焉有自餉於田而鳩之者哉。遂詢其所饋飲食。所經道路。婦曰。魚湯米飯。度自荆林。無他異也。許乃買魚作飯。投荆花於中。試之。狗獾無不死者。婦冤遂白。即日大雨。如注。

雞毒。

昔有蘇人出商於外。其妻畜雞以待其歸。數年方反。殺雞食之。夫即死。鄰人疑有外姦。首之太

守鞠之無他故。後細察其由。獄遂白。蓋雞食蜈蚣百虫。久則蓄毒。食之殺人。故養生家。雞老不食。又夏不食雞。

黃蠟炒雞。人食之。脹悶氣塞。三日而死。他毒可驗。此毒死如平人。絕無可驗。亦無可救法。

按辟穀諸方。每有用黃蠟者。云食之不飢。必須解下。然後可喫他物。解之之法。用青菜湯。或冬葵子湯。飲一二碗。藥即解下。依然未化也。若未解時。止可飲清水。凡有質有味者。俱不可食。食之必甚脹滿。然則黃蠟炒雞之毒。或亦前物可解乎。或麻油。大麻子汁。葵菜湯。波菱菜湯。亦可解乎。又黃蠟能飲氣不散。故凡九藥之珍貴者。以蠟裹之。可久貯不壞。今中此毒者。口鼻等竅。自當無血水流。出。但既脹悶而死。必有眼凸。臍凸。糞門凸。腹膨脹等狀。可驗。或屍已腐。當視其

腸胃必有蠟雞未化似宜取出洗去他穢以水煎之蠟浮水面候冷自凝成片仍作黃色此亦似屬可驗者乎

鯽毒

鉛山縣有賣薪者性嗜鯽一日自市歸飢甚妻烹鯽以進恣啖之腹痛而死鄰保謂妻毒夫執送官拷訊無據械繫踰年縣令閱其牘疑中鯽毒召漁者捕鯽得數百斤悉置水甕中有昂頭出水二三寸者數之得七令異之知爲他物所變其毒必甚細爲鞠究婦冤始白

守宮毒

鴛鵲後至九月凡茶水在几上經宿者雖渴甚不可飲因守宮之性見水則淫每於水內相交餘瀝遺入爲性最毒如誤飲時急覓地漿水解之或吐或瀉尚可拯救一二

衣有暑毒

夏日汗透衣。切不可於烈日中曬。若將乾。忽暴雨將至。急爲收納。則烈日之毒。卽鉗於內。如遇酷暑。汗出時。偶一衣之。則暑以引。其毒立中。症候全類傷寒。若誤作寒治。必至發狂。譫語。再誤投參芪桂附。陽以益陽。未有不至口鼻流血不已者。

有婦因聞從兄自遠至。更衣見之。時方冬月。凡所更衣。皆夏日所暴而藏者。婦方有娠。胎爲暑毒所中。激而生煩。腹痛脈伏。熱極似寒。諸醫誤認中寒。參附併投。病益煩悶而死。

空屋邪氣毒

房屋園林久閉。其中毒氣最盛。切莫急入。蓋久閉宅舍。陰疴潮疹。濕毒閉結不散。甚或狐淫邪魅。借以潛踪。蛇虺惡獸。從而盤踞。若夫園林深秘。恐更有異物潛身。必大其聲勢。或先之以火。

驚而散之。使其預匿。以免猝遇相傷也。

蛇虺涎毒

凡年久臺榭池館。藤蘿花樹。蓊鬱之下。不可恣爲烹飪。恐爲毒中。前明閩中一川姓鄉紳。得一園亭。掃除初就。卽宴邑令于園中。其時盛夏。蓮花正茂。飲將午夜。席未及半。邑令忽瞶瞶不語。疑爲沉醉。急扶昇回。入署未幾而殞。且縣素有蠱。因閩傳邑侯爲本紳所毒。事聞于上。奏請逮繫。獄遂成。然卒無可指之實。各存疑案。以待再推。延至十餘載。欽遣恤刑。往閱及半。毅然曰。饒毒之施。所以復讐怨。卽果讐而毒之。焉有大設筵宴。廣集多人。以肆其術之理。因訊本紳以宴客之園。置自何年。曰。係購得之。非自置也。訊以在內亭舍。曾鼎新否。曰。仍其舊。惟加巧慢而已。再訊以花樹亦蔭翳可觀否。曰。古樹逾圍。竹木亦頗叢森。更訊以被罪後。曾以售他人否。曰。得

此園卽腐禍人咸咎之。畏不敢售。故雖家業盡零。而此園獨存。恤刑隨呼縣令。請以風聞斯園。甲茲邑。當卽往遊。仍爲廣諭士民。各携餚酒。以示同樂。更命密具肴餚待用。衆咸莫解。所以至期。恤刑携縣令先往。呼士民隨之。至則啓其園。除辟草萊。令士民中有識宴邑令之所者。指其處。巍然大厦。羅積重簷。蘇陳古砌。恤刑曰。斯紳之寬。吾得之矣。命諸士民各以酒餚雜坐。盡飲至醉。以其餘各飲好事者。盡令升高。併力拆毀。於墻垣內得毒虺盈數石。若其不經見物。則不計也。恤刑曰。砌古則陰沴積。陰沴積。則苔蘚生。藤蘿附。卽爲蛇虺窟穴之地矣。而毒物又多乘陰氣以遊行。若其捕生自養。更以氣取。宴設至夜。蠅蚋之類。必爲叢積。諸物遊行梁上。吸其所欲而不得。涎墜餚中。誤而饜之焉。不立斃。若非斯園猶存。免何以白。

中煤炭毒。土炕漏火氣而臭穢者。人受薰蒸。不覺自

斃其屍軟而傷。與夜臥夢魘不能復覺者相似。

房中置水一盆。併使窻戶有透氣處。則煤炭雖臭。不能爲害。

律例館校正洗冤錄卷四

上海市歷史文
獻圖書館藏

目錄

急救方

救縊死

救溺死

治刃傷

救湯火傷

救中噎

救凍死

救腫

救中惡

救驚癇

救撲打碎死

救跌壓傷

治蛇蟲傷

治瘋狗傷

救服毒中毒方

解砒霜

解巴豆毒

解鼠莽毒

解莨菪毒

解苦杏仁毒

治菌毒

解毒草

解射罔毒

救眼

解藥蟲金石毒

解煤蒸毒

解斑猫荒青毒

解胡蔓草

解草烏頭毒

解輕粉冰片毒

治吞金

解水銀入耳

解飲饌毒

治蟲毒及金蠶蠱

辟穢方

三神湯

蘇合丸方

辟穢丹

律例館校正洗冤錄卷四

急救方

救縊死

凡縊從早至夜。雖冷亦可救。從夜至早稍難。若心下溫。一日以上猶可救。不得截繩。但緩緩抱解放臥。令一人踏其兩肩。以手提其髮。常令緊。不可使頭垂下。一人微微撚整喉嚨。以手擦胸上。散動之。一人磨擦臂足屈伸之。若已僵。但漸漸強屈之。又按其腹。如此一飯久。卽氣從口出。得呼吸。眼開甦醒後。又以官桂

湯及粥飲與之。令潤咽喉。更令一人以筆管吹其耳內。若依此救。無不活者。

官桂湯

廣陳皮

八分

厚朴

一錢

肉桂

五分

製半夏

一錢

乾薑

五分

甘草

三分

又法。緊用手罨其口。勿令通氣。兩時許。氣急即活。

又法。用皂角細辛等分爲末。如大豆許。吹兩鼻孔。

又法。用真野山羊血二三分。研極細。以好酒灌下。立活。

又法。凡男女縊死。身雖僵定。尙可救活。不可割斷繩。索抱起解下。安放平坦處。所仰面朝上。頭要扶正。先將手足慢慢曲彎。然後將大小便用綿軟之物裹緊。不令泄氣。用一人坐于頭前。兩腳踏其肩。揪住頭髮。將縊人之手拉直。令喉項通順。再用二人將細筆筒。或葦筒。入耳內。不住口吹氣。不住手撫摸其胸前。用活雞冠血。滴入喉鼻之中。男左女右。男用公雞。女用母雞。刻下卽能甦活。如氣絕時久。照前救法。務要多吹多摸。勿謂已冷。忽畧不救。

救溺死

水溺一宿者尙可救。搗皂角以綿裹納下部內。須臾出水卽活。或屈死人兩足著人肩上。以死人背貼生人背擔走。吐出水卽活。

又法先打壁泥一堵置地上。却以死者仰臥其上。更以壁土覆之。止露口眼。自然水氣喻入泥間。其人遂甦。雖身僵氣絕。用此法亦可救。

又法炒熟砂覆死八面。上下著砂。只留出口鼻。砂冷濕又換數易卽甦。

又醋半盞灌鼻中。

又綿裹石灰納下部中。水出即活。

又倒懸。以好酒灌鼻中及下部。

又倒懸。解去衣。去臍中垢。令兩人以筆管吹其耳。

又急解死人衣服。於臍上炙百壯。

又撈起時。急急將口撬音開。橫啣筋一隻。使可出水。

以竹管吹其兩耳。碾生半夏末。吹其鼻孔。皂角末置管中。吹其穀道。如係夏月。將溺人肚皮橫覆牛背之上。兩邊使人扶住。牽牛緩緩行走。腹中之水自然從

口中井大小便流出。再用生薑湯化蘇合丸灌之。或生薑汁灌之。若無牛。以活人覆臥躬腰。令溺人如前。將肚腹橫覆於活人身上。令活人微微動搖。水亦可出。若一時無牛。兼活人不肯拯救。或鍋一口。將溺人覆於鍋上亦可。如係冬月。急將濕衣解去。爲之更換。一面炒鹽用布包熨臍。一面厚鋪被褥。取竈內不著草灰。多多鋪於被褥之上。令溺人覆臥于上。臍下墊以綿枕一個。仍以草灰將渾身厚蓋之。灰上再加被褥。不可使灰暍於眼內。其撻口脚筋。灌蘇合丸生薑

湯吹耳鼻穀道等事。俱照夏天法。冬天甦醒後。宜少飲溫酒。夏天宜少飲粥湯。按灰性煖而能拔水。凡蠅溺水死者。以灰埋之。少頃卽活。此明驗也。

又以酒罈一個。紙片一把。燒放罈內。急以罈口覆臍上。冷卽再燒紙片。放罈內。覆臍。去水卽活。

又初救起之時。尙有微氣。或胸前尙煖。速令生人脫貼身裏衣。爲之更換。抱擔身上。將屍微微倒側之。令其腹內水流出。若水往外流。卽有生機。一面用粗紙燎灼。取烟薰其鼻竅。稍薰片時。卽用皂角研細。吹入

鼻竅。但得微有一嚏噴。即可得生。

治刃傷

凡殺傷不透膜者。乳香沒藥各一皂角子大。研爛以小便半盞。好酒半盞同煎。半溫服。然後用花蕊石散。或烏賊魚骨。或龍骨爲末。敷瘡口上卽止。昔推官朱瑒。定驗兩處殺傷。氣偶未絕。亟令保甲取葱白。熱鍋炒熟。遍敷傷處。繼而呻吟。再易葱白。傷者無痛矣。

花蕊石散

乳香

沒藥

羌活

紫蘇

蛇含石

童便煨
三次

草烏

厚朴

白芷

細辛

降香

當歸

南星

輕粉

蘇木

檀香

龍骨

各二錢

麝香

三分

花蕊石

五錢童便煅七次

右共研極細。確收聽用。葱湯洗淨。用此糝之。軟綿紙蓋扎。一日一換。神效。

又被刀傷。血出不止。用紫藤香。

卽降香佳者

瓦礫刮下。

石碾碾細敷之。血卽止。又無癰痕。

又刀刃傷。痛不可止。用好雞骨炭。擲地上。鏗然有聲。

者與松香明透者等分。捶成一塊。再多用老韭菜搗汁。拌入陰乾。如此拌捶三四遍。後爲細末收貯。上巳端午七夕等日製之。敷患處痛立止。完好如常。

金瘡腸出者。用小麥五升。水九升。煮四升。綿濾淨汁。待極冷。令病人臥席上。一人含汁。嚥其背。則腸漸入。嚥時勿令病人知之。及多人在旁言語。如未入。抬席四角輕搖。則自入。旣入者。須用麻油潤線縫緊。仍以潤帛紮束。慎勿驚動。使瘡口復迸。

被箭鏃傷者。用陳醃肉去皮。取紅活美好者。用其肥。

細切剉濃。將象牙末。及人所退爪甲爲末。共研極細。拌入所剉醃肉內。再爲勻剉。令其合一。厚敷箭鏃。週圍一飯頃。其鏃卽自爲迸脫。

救湯火傷

湯潑受傷。急覓水中大蚌。置磁盤中。將其口向上。置無人處。俟其口自開時。預將冰片二三分。真當門麝二三分。同研細末。以匙挑一二分。傾入蚌口內。其口卽合。而蚌內之肉。卽化爲漿。然後再入冰麝少許。用雞翎粘掃傷處。先從四面邊沿層層掃入。痛楚自減。如無大蚌。小者亦可。此急救最驗之第一方也。及其火氣已退。將用下蚌殼燒灰存性。碾細末。入冰麝少許。從邊圍掃。如無蚌處。用冰片從四面摩起。漸及於

中亦可漸瘥。

凡被湯火切勿以冷水冷物及井下泥尿泥激之。其熱氣遇冷則入之愈深。輕者攣縮。重則直逼。火毒攻心而速之死矣。

一法用好杭粉爲細末。同婦女所用好頭油調塗之。如無或栢子油亦可。

又法用多年陳醬。寬寬塗之。但愈後有黑瘡。

又用劉寄奴爲末。先以糯米漿雞翎掃傷著處。後糝藥末並不痛。亦並無痕。大約湯火著。急以鹽末糝之。

護內不壞。然後用藥敷之。至妙。

又用生大黃。以米醋調敷。二日卽愈。

救中暈

暈死于行路上。旋以刀器掘開一穴。入水擣之。取爛漿以灌死者。卽活。

中暈不省人事者。與冷水吃。卽死。但且急取灶間微熱灰壅之。復以稍熱湯蘸手巾。熨腹脇間。良久甦醒。不宜便與冷物喫。

暑月熱倒。急扶在陰涼處。切不可與冷水飲。當以布巾衣服等蘸熱湯。覆臍下。及氣海間。續以湯淋布帛上。令徹臍腹。但煖則漸甦也。如倉卒無湯處。搗道上

熱土於臍端。以多爲佳。冷則頻換。後與解暑毒藥。或道塗無湯處。卽掬熱土於臍上。仍撥開作窩子。令衆人旋溺於其中。以代熱湯。亦可取效。

凡中暑。如已迷悶。嚼大蒜一大瓣。冷水送下。如不能嚼。卽用水研灌之。立醒。路中倉卒無水。渴甚急。嚼生葱二寸許。和津同嚥。可抵飲水二升。

中暑暴死。以胡麻一升炒黑。攤冷爲末。新汲水調下。

救凍死

凍死。四肢直。口噤。有微氣者。用大鍋炒灰令煖。袋盛。

熨心上。冷卽換之。候目開。以溫酒及清粥。稍稍與之。若不先溫其心。便以火炙。則冷氣與火爭。必死。

又用氈或藁荐捲之。以索繫定。放在平穩處。令二人相對踏。令滾轉往來。如扞氈法。候四肢溫卽活。

冬月溺水之人。及被凍極之人。雖纖毫人事不知。但胸前有微溫。皆可救。倘或微笑。必爲急掩其口鼻。如不掩。則笑而不止。不可救矣。切不可驟令近火。但一見火。則必大笑。不可救藥。

凡凍死已經救活者。宜用生薑。

帶皮搗碎

陳皮。

搗碎

用水三

碗煎一碗溫服。

救魘

魘死不得用燈火照。并不得近前急喚。但痛咬其足跟及足大拇趾。頻頻呼其名。及唾其面。再灌以薑湯必活。

魘不醒者。移動些小臥處。徐徐喚之。卽醒。夜間魘者。原有燈卽存燈。無燈者。不可用燈照。

又用筆管吹兩耳。及取病人頭髮二七莖。撚繩刺入鼻中。○又鹽湯灌之。

又研韭菜汁半盞灌鼻中。冬用根亦可得嚏。

又炙兩足大拇趾聚毛中。三七壯。聚毛乃脚趾向上生毛處。

又方皂角末如豆許吹兩鼻內得嚏則氣通。三四日者尚可救。

斃死者若身未冷。急以酒調蘇合丸灌之。卽活。

救中惡

凡中惡客忤猝死者。或先病及睡臥間。忽然而絕。皆是中惡也。用韭菜黃心於男左女右鼻內刺入六七寸。令目開血出卽活。

視上唇內沿。有如粟米粒。以針挑破。

又用皂角。或生半夏末。如大豆許。吹入兩鼻。

又用羊屎。燒烟熏鼻中。

又綿浸好醋半盞。手按令汁入鼻中。及捉其兩手。勿令驚。須臾卽活。

又炙臍中百壯。鼻中吹皂角末。或研韭汁灌耳中。

又川生薑蒲研。取汁一盞灌之。

救驚斃

驚怖死者。以溫酒一兩盃灌之。卽活。

救撲打猝死

五絕及撲打猝死等。但須心頭溫煖。雖經日亦可救。先將死人盤屈在地上。如僧打坐狀。令一人將死人頭髮控放低。用生半夏末。以竹筒或紙筒筆管吹在鼻內。如活。卽以生薑自然汁灌之。可解半夏毒。五絕者。謂產魅蠱魔。溺治法。單用半夏一味。○生薑自然汁。用生薑搗爛取汁。不用水者是。卒暴墮擗築倒。及鬼魘死。若肉未冷。急以酒調蘇合香丸灌入口。若下喉去可活。

救跌壓傷

凡跌壓傷重之人。口耳出血。一時昏暈。但視面色尙有生氣。身體尙爲綿軟。則皆可救。但不可多人環繞。嘈雜驚慌。致令驚魂不復。急令親人呼而扶之。坐於地上。先拳其兩手兩足。緊爲抱定。少頃再輕移於相呼之人懷中。以膝抵其穀道。不令洩氣。若稍有知覺。卽移於素所寢處。將室內窻櫺遮閉。令暗。仍拳手足緊抱。不可令臥。急取童便。乘熱灌之。馬溺更妙。如一時不可得。卽人溺亦可。要去其頭尾。但須未食葱蒜而清利者。強灌一二盃。下得喉去便好。一面用四物。

湯照原方加三四倍。再入桃仁去皮尖及好紅花各一兩。全當歸及南山楂搗碎各二兩。生大黃二兩。童便一大鍾。如係夏月。加黃連四五分。多川急流水。卽在旁用急火煎半熟。傾入碗內。承於傷者鼻下。使藥氣透入腹內。則不致入口惡逆。乘熱用小鍾強令頓服。如其不受。則姑緩。少刻又進。只要陸續灌盡。不可使臥。服藥之後。其穀道尤須用力抵緊。不可令其洩氣。如藥已行動。非至緊不可卽解。恐其氣從下洩。以致不救也。必俟腹中動而有聲。上下往來數遍。急不

能待。方可翼之以解。所下盡屬淤紫。毒已解半。方可令睡。至所下盡爲糞。卽停止前藥。否則再用一二劑。亦不碍。然後次第調理。不可輕用補藥。

四物湯

當歸 一錢

川芎 七分

熟地黃 三錢

炒白芍 一錢

治蛇虫傷

毒蛇能斃人。惟急以利刀割去所嚙之死肉。可以漸解。

蛇傷虫咬。倉卒無藥。以大藍汁一碗。雄黃末二錢。調勻。點在所傷處。併令細細服其汁。如無藍。以靛花青黛代之。

虺蝮傷人。其毒內攻。卽死。立將傷處。用繩絹紮定。勿使毒入心腹。令人口含米醋。或燒酒。吮傷以吸拔其毒。隨吮隨吐。隨換酒醋。再吮。俟紅淡腫消爲度。吮者不可誤嚥中毒。又急飲麻油一二盞。護心解毒。以薑末敷之。

被蝮螫死。用香白芷一味。以麥冬湯調服。急以水代。

之。飲之卽活。

又方。用五靈脂一兩。雄黃五錢。以酒調灌。每服二錢。再以滓塗咬處。

治癲狗傷

乘毒未發。用斑貓七個。去頭足翹淨。用雞蛋二枚同蒸。去斑貓。淡食雞蛋。於小便內取下血塊。痛脹不解。則血塊未淨。仍再食。塊盡乃止。

又法。用斑貓同米炒。俟米老黃。去斑貓。將米研末。蒸雞蛋食如前法。血塊下盡爲度。

又法受咬後。立至溪河。將傷處洗。擠血淨盡。多飲生
薑汁。則毒可解。仍封紫瘡口。勿使受風。

救服毒中毒方

解砒毒

砒霜服下未久者。取雞蛋一二十個。打入碗內攪勻。入明礬末三錢。灌之。吐則再灌。吐盡便愈。但服久。砒已入腹。則不能吐出。急用黑鉛四兩。重一塊。用井水於石上磨出黑汁。旋磨旋灌。盡則愈。卽先吐出之後。亦宜再用鉛水服之。以盡餘毒。方無後患。

中砒霜毒。急取熱鴨血灌之。立解。又糞青灌之。亦解。又方。以豆豉濃煎湯飲之。可解。

又用甘草汁同藍汁飲之。卽愈。

又用熟豆腐漿灌之。亦效。

解巴豆毒

中巴豆毒。痢不止。以大豆一升。煮汁飲之。

又巴豆畏大黃黃連。蘆筍。菰筍。黎蘆。各煎冷服。皆能止泄。

又用芭蕉葉搗自然汁服之。卽止。

解鼠莽毒

黑豆汁可解。又方用枯蓮房殼帶蒂梗陰乾咬咀。

煎水二三碗灌之。如無。用荷葉中心蒂。或用藕節煎湯一碗溫冷灌之。毒卽散。

解莨菪毒

用甘草汁。或藍青汁。飲之卽愈。若服藥卽劇。

解苦杏仁毒

用杏樹皮煎湯飲之。雖迷亂將死者。亦可救。

解斑猫茺青毒

茺青
官

用猪膏。大豆汁。或鹽藍汁。服之。或用鹽湯煮猪膏。巴豆飲之。又或用大小黑豆汁服之。並瘥。用肥皂水灌。

下再以鵝翎絞喉數次令吐卽活。

又方用生鷄鴨卵開孔灌入口中連灌五六枚得吐卽活。倘閉以箸抉開灌入。

治菌毒

四明溫台間山谷多產菌。然種類不一。食之間有中毒。往往至殺人。蓋蛇虺毒氣所薰蒸也。有僧教掘地以冷水攪之令濁。少頃取飲皆得全活。其方自見本草。楓樹菌食之笑不止。俗言笑菌居山間不可不知此法也。

解胡蔓草

中胡蔓草毒。將糞汁灌之可解。或飲浸草毒水。百發潰血。急取抱卵不出之雞。蛋研細。和麻油。開口灌之。吐出可救。

解毒草

誤食毒草至吐。卽採生金銀花嚼之。可解。

解草烏頭毒

用飴糖黑豆冷水解之。

解射罔毒

用甘草汁。或小豆葉。浮萍。薺。荊。汁。冷水解之。

薺。荊。又名甜結。

梗。河南人呼爲杏葉沙參。能解百藥毒。

解輕粉毒

用黑鉛五斤。打壺一把。盛燒酒十五斤。納土茯苓半斤。乳香三錢。封固。重湯煮一日夜。埋土中。出火毒。每日早晚任飲數盃。溺時以瓦盆接之。當有粉出。服至筋骨不痛乃已。○冰片毒。飲以新汲冷水可解。

救服瀉

服鹽瀉。將常用擦桌布洗水。灌之。使吐即解。

治吞金

中黃金毒者。食鷓鴣肉。中白銀毒者。以黃連甘草解之。又洗金以鹽。略耽驢馬脂。餘甘子。皆能柔金。羊脂養子。皆能柔銀。吞金銀入腹中。當服食前品。柔則易出。

又服金者。用真輕粉細水調下。能令金從大便出。

解藥蠱金石毒

治一切藥毒蠱毒金石毒。用石炭以熱水磨服。

解水銀入耳

以黃金枕耳邊自出。若水銀入肉。令人筋攣。以金物熨之。水銀乃出。蝕金其病卽瘥。

解煤熏毒

飲冷水可解。或蘿蔔搗汁灌口鼻。移向風吹。便能醒。

解飲饌毒

凡中飲饌毒。不知何物。卽煎甘草。薺苳湯飲之。便治。

治蠱毒及金蠶蠱

泉州一僧能治金蠶蠱毒。如中毒者。先以白礬末令嘗。不澁覺味甘。次食黑豆不腥。乃中毒也。卽濃煎石榴皮根飲之下。卽吐出蟲皆活。無不愈者。李晦之云。凡中毒。以白礬芽茶搗爲末。冷水飲之。卽愈。

保靈丹

治蠱毒諸毒
一切藥毒

大山豆根

半兩

雄黃

硃砂

淨細研
一兩

黃藥子

黃丹

麝香

斑猫

二錢半
去頭足

糯米

半生
半炒

赤蜈蚣

二條一
生一炙

川巴豆

肥者取肉不去油二錢半

續隨子

生杵末二錢半

右藥入乳鉢研和。于端午重陽臘日修合。宜避婦人及雞犬。用糯米湯和丸。如龍眼核大。陰乾。磁合收。每一丸好茶清吞下。不得嚼破。須臾毒物下。藥丸凝血並下。以水淨收。可救三人。

治諸蠱毒。用鰻鱧魚乾末。空心服之。魚或燒炙令香食之。其魚有五色文者佳。

誌云嶺南俚人解蠱毒。畏人知其方。乃謠言三百頭牛藥。或云三百兩銀藥。久與親狎。始得其實。所云三百頭牛藥者。土常山也。三百兩銀藥者。馬兜鈴也。俱用水煎服。即愈。

福清縣有訟遭金蠶毒者縣令治之不得蹤或
獻謀取兩刺蝟入桶必獲蝟獸類遍身有刺如
栗房蓋卽山中之刺鼠也金蠶畏蝟蝟入其家
金蠶不敢動雖匿榻下墻罅盡爲兩刺蝟擒出
之

辟穢方

三神湯

蒼朮

二兩米泔浸兩宿焙乾

白朮

半兩

甘草

半兩炙

右爲細末每服二錢入鹽少許點白湯服。

辟穢丹能辟穢氣。

麝香

少許

細辛

半兩

甘松

一兩

川芎

二兩

右爲細末蜜圓如彈子大久窰爲妙每用一圓燒之。

蘇合丸每一丸含化尤能辟惡。

犀角尖

丁香

香附

安息香

明天麻

沉香

白朮

檀香

木香

畢撥

硃砂

訶子肉

白豆蔻肉

麝香

蘇合油

台烏

各二兩

大片腦

乳香

各二兩或一兩

黃蠟

三十斤

蜜

六斤或五斤

金箔

一百片

右藥一十八味各取淨末煉蜜搗和為丸金箔為

衣用蠟作丸裹之

或不用蜜丸別以糯米糊搗和印成香佩亦妙